



**JUDICIAL SYSTEM MONITORING PROGRAMME PROGRAMA DE
MONITORIZAÇÃO DO SISTEMA JUDICIAL**

Press Release

Periodu: Otubru 2010

Edisaun: 08 Outubru 2010

JSMP Hato'ó Submisaun Konabá Indultu ba Ministériu Justisa

Iha loron 08 Outubru 2010, Judicial System Monitoring Programme (JSMP) liu husi unidade Peskizador Jurídika hato'ó submisaun ba Ministériu Justisa konabá kestaun Poder Prezidensiál ba Indultu no Hamenus Sentensa. Iha submisaun ne'e JSMP apresenta ideas no perspetiva oinsá mak tenke fo atensaun ba asuntu ne'e. Submisaun ne'e ho titlu "*Poder Prezidensiál ba Indultu no Hamenus Sentensa; Persiza Lei ida Ne'ebé Klaru*".

Direitór JSMP, Luis de Oliveira Sampaio esplika katak, ho submisaun ne'e JSMP hakarak ofere ideas ruma ba governu liu-liu ba Ministériu Justisa hodi dezenvolve lei ne'ebé nesesáriu konabá poder indultu Prezidensiál. Liu tan nia haktuir katak dezenvolvimentu lei konabá indultu prezidensiál persiza hatuur kriterius ida ne'ebé klaru hodi hala'ó poder prezidensiál, hamutuk ho medida sira seluk, ne'e importante atu asegura katak setór justisa bele kontinua atu dezenvolve no fórnese justisa ba ema Timór Léste.

Aleinde ne'e diretor mós aumenta katak submisaun ne'ebé JSMP ofere ba Ministériu Justisa ne'e hanesan meus ida hodi ajuda Ministériu Justisa atu kria lei ruma kona ba indultu atu nune'é bainhira Prezidente da Repúblika fó indultu ruma ba prizonarius sira tenke bazea ba lei.

Iha parte seluk Ministra da Justisa, Lucia Maria Brandão Lobato hateten katak husi nia parte sente kontente tebes ho relatóriu ne'ebé JSMP ofere ona ba ninia Ministériu, maske Ministra hatene klaru katak relatóriu hotu inklui JSMP ninia relatóriu sempre hato'ó sira ninia krítika, maibé ida ne'e normal iha nasaun demokrátiku ida. Liu tan Ministra mós husu JSMP ninia kolaborasaun iha futuru, hodi nune'é JSMP fó mos ninia kontribuisan hodi hamosu esbosu lei konaba indultu ne'e rasik. Ministra sempre pruntu no kontente liu atu ko'alia iha semináriu kona ba asuntu indultu ne'e,

JSMP reafirma katak JSMP pruntu nafatin atu kolabora ho Governu liu-liu Ministériu Justisa hodi hamosu esbosu lei indultu ne'e, maibé JSMP la garante katak iha tempu badak nia laran. Tanbá JSMP sei haré mós ba ninia rekursu interna ne'ebé oras ne'e dau-daun iha. Maski nune'é JSMP sei hare proposta ne'e atu oinsá bele kolabora nafatin hodi fó JSMP ninia kontribuisaun ba dezenvolvimentu sistema judisiariu iha Timor Leste.

Atu hetan informasaun kle'an favor kontaktu:

Luis de Oliveria Sampaio

Direitór Ezekutivu JSMP

Diresaun e-mail: luis@jsmp.minihub.org

Landline: 3323883